



資治通鑑卷第一百二十四

宋紀六

起玄默敦牂五年

太祖文皇帝中之中

元嘉十九年春正月甲申魏主備瀆駕詣道壇受符
籙旗幟盡青自是每帝即位皆受籙謙之又奏作靜
輪宮必令其高不聞雞犬欲以上接天神崔浩勸帝
為之功費萬計經年不成太子晃諫曰天人道殊卑
高定分不可相接理在必然今虛耗府庫疲弊百姓
為無益之事將安用之必如謙之所言請因東山萬
仞之高為功差易帝不從 夏四月沮渠無諱將萬

餘家棄敦煌西就沮渠安周末至鄯善王比龍畏之
將其衆奔且末其世子降於安周無諱遂據鄯善其
士卒經流沙渴死者大半李寶自伊吾帥衆二千入
據敦煌繕修城府安集故民沮渠牧犍之亡也涼州
人闕爽據高昌自稱太守唐契爲柔然所逼擁衆西
趨高昌欲奪其地柔然遣其將阿若追擊之契敗死
契弟和收餘衆奔車師前部王伊洛時沮渠安周屯
橫截城和攻拔之又拔高寧白力二城遣使請降於
魏 甲戌上以疾愈大赦 五月裴方明等至漢中
與劉真道分兵攻武興下辯白水皆取之楊難當

建節將軍符弘祖守蘭臯使其子撫軍大將軍和將
重兵爲後繼方明與弘祖戰於濁水大破之斬弘祖
和退走追至赤亭又破之難當奔上邽獲難當兄子
建節將軍保熾難當以其子虎爲益州刺史守陰平
聞難當走引兵還至下辨方明使其子肅之邀擊之
擒虎送建康斬之仇池平以輔國司馬胡崇之爲北
秦州刺史鎮其地立楊保熾爲楊玄後使守仇池魏
人遣中山王辰迎楊難當詣平城秋七月以劉真道
爲雍州刺史裴方明爲梁南秦二州刺史方明辭不
拜丙寅魏主使安西將軍古弼督隴右諸軍及殿中

虎賁與武都王楊保宗自祁山南入征西將軍漁陽皮豹子與琅邪王司馬楚之督關中諸軍自散關西入俱會仇池又使譙王司馬文思督洛豫諸軍南趨襄陽征南將軍刁雍東趨廣陵移書徐州稱爲楊難當報仇 甲戌晦日有食之 唐契之攻闕爽也爽遣使詐降於沮渠無諱欲與之共擊契八月無諱將其衆趨高昌比至契已死爽閉門拒之九月無諱將衛興奴夜襲高昌屠其城爽奔柔然無諱據高昌遣其常侍汜雋奉表詣建康詔以無諱爲都督涼河沙三州諸軍事征西大將軍涼州刺史河西王 冬十月己卯魏立皇子伏羅爲晉王翰爲秦王譚爲燕王建爲楚王余爲吳王 甲申柔然遣使詣建康 十二月辛巳魏襄城孝王盧魯元卒 丙申詔魯郡修孔子廟及學舍蠲墓側五戶課役以供灑掃 李寶遣其弟懷達子承奉表詣平城魏人以寶爲都督西垂諸軍事鎮西大將軍開府儀同三司沙州牧敦煌公四品以下聽承制假授 雍州刺史晉安襄侯劉道產卒道產善爲政民安其業小大豐贍由是民間有襄陽樂歌山蠻前後不可制者皆出緣沔爲村落戶口殷盛及卒蠻追送至沔口未幾群蠻大動征西

司馬朱脩之討之不利詔建威將軍沈慶之代之殺虜萬餘人 魏主使尚書李順羨次群臣賜以爵位順受賄品第不平是歲涼州人徐桀告之魏主怒且以順保庇沮渠氏面欺誤國賜順死 二十年春正月魏皮豹子等進擊樂鄉將軍王奐之等敗沒魏軍進至下辯將軍強玄明等敗死二月胡崇之與魏戰於濁水崇之爲魏所擒餘衆走還漢中將軍姜道祖兵敗降魏魏遂取仇池楊保熾走 丙午魏主如恒山之陽三月庚申還宮 壬戌烏洛侯國遣使如魏初魏之居北荒也鑿石爲廟在烏洛

西北以祀其先高七十尺深九十步及烏洛侯使者至魏言石廟具在魏主遣中書侍郎李敞詣石廟致祭刻祝文於壁而還去平城四千餘里 魏河間公齊與武都王楊保宗對鎮維谷保宗弟文德說保宗令閉險自固以叛魏或以告齊夏四月齊誘執保宗送平城殺之前鎮東司馬符達征西從事中郎任朏等遂舉兵立楊文德爲主據白崖分兵取諸戍進圍仇池自號征西將軍秦河梁三州牧仇池公 甲午立皇子誕爲廣陵王 丁酉魏大赦 巳亥魏主如陰山 五月魏古弼發上邽高平岍城諸軍擊楊文

德文德退走皮豹子督關中諸軍至下辯聞仇池解圍欲還弼遣人謂豹子曰宋人耻敗必將復來軍還之後再舉爲難不如練兵蓄力以待之不出秋冬宋師必至以逸待勞無不克矣豹子從之魏以豹子爲仇池鎮將楊文德遣使來求援秋七月癸丑詔以文德爲都督北秦雍二州諸軍事征西大將軍北秦州刺史武都王文德屯葭蘆城以任肅爲左司馬武都陰平氏多歸之甲子前雍州刺史劉真道梁南秦二州刺史裴方明坐破仇池滅匿金寶及善馬下獄死九月辛巳魏主如漠南甲辰捨輜重以輕騎襲

柔然分軍爲四道樂安王範建寧王崇各統十五將出東道樂平王丕督十五將出西道魏主出中道中山王辰督十五將爲後繼魏主至鹿渾谷遇敕連可汗太子晃言於魏主曰賊不意大軍猝至宜掩其不備速進擊之尚書令劉絜固諫以爲賊營中塵感其衆必多出至平地恐爲所圍不如須諸軍大集然後擊之晃曰塵之盛者由軍士驚怖擾亂故也何得營上而有此塵乎魏主疑之不急擊柔然遁去追至石水不及而還旣而獲柔然候騎曰柔然不覺魏軍至上下惶駭引衆北走經六七日知無追者始乃徐行

魏主深恨之自是軍國大事皆與太子謀之司馬楚之別將兵督軍糧鎮北將軍封沓亡降柔然說柔然令擊楚之以絕軍食俄而軍中有告失驢耳者諸將莫曉其故楚之曰此必賊遣姦人入營覘伺割驢耳以爲信耳賊至不乂宜急爲之備乃伐柳爲城以水灌之令凍城立而柔然至冰堅滑不可攻乃散走十一月將軍姜道盛與楊文德合衆二萬攻魏濁水戍魏皮豹子河間公齊救之道盛敗死 甲子魏主還至朔方下詔令皇太子副理萬機總統百揆且曰諸功臣勤勞日乂皆當以爵歸第隨時朝請饗宴朕

前論道陳謨而已不宐復煩以劇職更舉賢俊以備百官十二月辛卯魏主還平城

二十一年春正月己亥帝耕藉田大赦 壬寅魏太

子始總百揆命侍中中書監穆壽司徒崔浩侍中張黎古弼輔太子決庶政上書者皆稱臣儀與表同古弼爲人忠慎質直嘗以上谷苑囿太廣乞減大半以賜貧民入見魏主欲奏其事帝方與給事中劉樹圍碁志不在弼弼侍坐良久不獲陳聞忽起捽樹頭掣下牀搏其耳毆其背曰朝廷不治實爾之罪帝失容捨碁曰不聽奏事朕之過也樹何罪置之弼具以狀

聞帝皆可其奏弼曰爲人臣無禮至此其罪大矣出
詣公車免冠徒跣請罪帝召入謂曰吾聞築社之役
蹇蹙而築之端冕而事之神降之福然則卿有何罪
其冠履就職苟有可以利社稷便百姓者竭力爲之
勿顧慮也太子課民稼穡使無牛者借人牛以耕種
而爲之芸田以償之凡耕種二十二畝而芸七畝大
略以是爲率使民各標姓名於田首以知其勤惰禁
飲酒遊戲者於是墾田大增 戊申魏主詔王公以
下至庶人有私養沙門巫覡於家者皆遣詣官曹過
二月十五日不出沙門巫覡死主人門誅庚戌又詔

王公卿大夫之子皆詣太學其百工商賈之子當各
習父兄之業毋得私立學校違者師死主人門誅

二月辛未魏中山王辰內都坐大宮薛辨尚書奚眷
等八將坐擊柔然後期斬於都南初魏尚書令劉絜
父典機要恃寵自專魏主心惡之及將襲柔然絜諫
曰蠕蠕遷徙無常前者出師勞而無功不如廣農積
穀以待其來崔浩固勸魏主行魏主從之絜耻其言
不用欲敗魏師魏主與諸將期會鹿渾谷絜矯詔易
其期帝至鹿渾谷欲擊柔然絜諫止之使待諸將帝
留鹿渾谷六日諸將不至柔然遂遠遁追之不及軍

還經漠中糧盡士卒多死絜陰使人驚魏軍勸帝委軍輕還帝不從絜以軍出無功請治崔浩之罪帝曰諸將失期遇賊不擊浩何罪也浩以絜矯詔事白帝帝至五原收絜囚之帝之北行也絜私謂所親曰若車駕不返吾當立樂平王絜聞尚書右丞張嵩家有圖讖問曰劉氏應王繼國家後吾有姓名否嵩曰有姓無名帝聞之命有司窮治索嵩家得讖書事連南康公狄鄰絜嵩鄰皆夷三族死者百餘人絜在勢要好作威福諸將破敵所得財物皆與絜分之既死籍其家財巨萬帝每言之則切齒癸酉樂平戾王丕以

憂卒初魏主築白臺高二百餘尺丕夢登其上四顧不見人命術士董道秀筮之道秀曰大吉丕默有喜色及丕卒道秀亦坐棄市高允聞之曰夫筮者皆當依附爻象勸以忠孝王之問道秀也道秀宜曰窮高爲亢易曰亢龍有悔又曰高而無民皆不祥也王不可以不戒如此則王安於上身全於下矣道秀反之宜其死也 庚辰魏主李廬 巳丑江夏王義恭進位太尉領司徒 庚寅以侍中領右衛將軍沈演之爲中領軍左衛將軍范曄爲太子詹事 辛卯立皇子宏爲建平王 三月甲辰魏主還宮 癸丑魏主

遣司空長孫道生鎮統萬 夏四月乙亥魏侍中太宰陽平王杜超爲帳下所殺 六月魏北部民殺立義將軍衡陽公莫孤帥五千餘落北走遣兵追擊之至漠南殺其渠帥餘徙冀相定三州爲營戶 吐谷渾王慕利延兄子緯世與魏使者謀降魏慕利延殺之是月緯世弟叱力延等八人奔魏魏以叱力延爲歸義王 沮渠無諱卒弟安周代立 魏入中國以來雖頗用古禮祀天地宗廟百神而猶循其舊俗所祀胡神甚衆崔浩請存合於祀典者五十七所其餘復重及小神悉罷之魏主從之 秋七月癸卯魏主

雍州刺史沮渠秉謀反伏誅

八月乙丑魏主畋于

河西尚書令古弼留守詔以肥馬給獵騎弼悉以弱者給之帝大怒曰筆頭奴敢裁量朕朕還臺先斬此奴弼頭銳故帝常以筆目之弼官屬惶怖恐并坐誅弼曰吾爲人臣不使人主盤于遊畋其罪小不備不虞乏軍國之用其罪大今蠕蠕方彊南寇未滅吾以肥馬供軍弱馬供獵爲國遠慮雖死何傷且吾自爲之非諸君之憂也帝聞之歎曰有臣如此國之寶也賜衣一襲馬二匹鹿十頭他日魏主復畋於山北獲麋鹿數千頭詔尚書發牛車五百乘以運之詔使已

去魏主謂左右曰筆公必不與我汝輩不如自以馬
運之遂還行百餘里得弼表曰今秋穀懸黃麻菽布
野猪鹿竊食鳥鴈侵費風雨所耗朝夕三倍乞賜矜
緩使得收載帝曰果如吾言筆公可謂社稷之臣矣
魏主使員外散騎常侍高濟來聘 戊辰以荊州
刺史衡陽王義季為征北大將軍開府儀同三司南
兗州刺史以南譙王義宣為荊州刺史初帝以義宣
不才故不用會稽公主屢以為言帝不得已用之先
賜中詔敕之曰師護以在西父比表求還今欲聽許
以汝代之師護雖無殊績絜已節用通懷期物不恣

群下聲著西土為上上庶所安論者乃未議遷之今之
回換更為汝與師護年時一輩欲各試其能汝往脫
有一事減之者既於西夏交有巨礙遷代之譏必歸
責於吾矣此事亦易勉耳無為使人復生評論也義
宣至鎮勤自謀厲事亦脩理庚辰會稽長公主卒
吐谷渾叱力延等請師於魏以討吐谷渾王慕利延
魏主使晉王伏羅督諸軍擊之 九月甲辰以沮渠
安周為都督涼河沙三州諸軍事涼州刺史河西王
下未魏主如漠南將襲柔然柔然敕連可汗遠遁
乃止敕連尋卒子吐賀真立號處羅可汗 魏晉王

伏羅至樂都引兵從間道襲吐谷渾至大毋橋吐谷渾王慕利延大驚逃奔白蘭慕利延兄子拾寅奔河西魏軍斬首五千餘級慕利延從弟伏念等帥萬三千落降於魏 冬十月己卯以左軍將軍徐瓊爲兗州刺史大將軍參軍申恬爲冀州刺史徙兗州鎮須昌冀州鎮歷下恬謨之弟也 十二月丙戌魏主還平城 是歲沙州牧李賢入朝于魏魏人留之以爲外都大官 太子率更令何承天撰元嘉新曆表上之以月食之衝知日所在又以中星檢之知堯時冬至日在須女十度今在斗十七度又測景校三至差

三日有餘知今之南至日應在斗十三四度於是更立新瀆冬至徙上三日五時日之所在移舊四度又月有遲疾前歷合朔月食不在朔望今皆以盈縮定其小餘以正朔望之日詔付外詳之太史令錢樂之等奏皆如承天所上唯月有頻三大頻二小比舊瀆殊爲乖異謂宜仍舊詔可

二十二年春正月辛卯朔始行新曆初漢京房以十二律中呂上生黃鍾不滿九寸更演爲六十律錢樂之復演爲三百六十律日當一管何承天立議以爲上下相生三分損益其一蓋古人簡易之瀆猶如古

曆周天三百六十五度四分度之一也而京房不悟
謬爲六十乃更設新律林鍾長六寸一釐則從中呂
還得黃鍾十二旋宮聲韻無失 壬辰以武陵王駿
爲雍州刺史帝欲經略關河故以駿鎮襄陽 魏主
使散騎常侍宋愔來聘 二月魏主如上黨西至吐
京討徙叛胡出配都縣 甲戌立皇子祿爲東海王
昶爲義陽王 三月庚申魏主還宮 魏詔諸疑獄
皆付中書以經義量決 夏四月庚戌魏主遣征西
大將軍高涼王那等擊吐谷渾王慕利延於白蘭太
州刺史代人封敕文安遠將軍乙烏頭擊慕利延兄

子什歸於抱罕

河西之二也鄯善人以其地與魏

鄰大懼曰通其使人知我國虛實取亡必速乃閉斷
魏道使者往來輒鈔劫之由是西域不通者數年魏
主使散騎常侍萬度歸發涼州以西兵擊鄯善 六
月壬辰魏主北巡 帝謀伐魏罷南豫州入豫州辛
亥以南豫州刺史南平王鑠爲南豫州刺史 秋七月
己未以尚書僕射孟顛爲左僕射中護軍何尚之爲
右僕射 武陵王駿將之鎮時緣沔諸蠻猶爲寇水
陸梗礙駿分軍遣撫軍中兵參軍沈慶之掩擊大破
之駿至鎮蠻斷驛道欲攻隨郡隨郡太守河東柳元

景募得六七百人邀擊大破之遂平諸蠻獲七萬餘口湏山蠻最彊沈慶之討平之獲三萬餘口徙萬餘口於建康吐谷渾什歸聞魏軍將至棄城夜遁八月丁亥封敕文入枹罕分徙其民千家還上邽留乙烏頭守枹罕萬度歸至敦煌留輜重以輕騎五千度流沙襲鄯善壬辰鄯善王真達面縛出降度歸留軍屯守與真達詣平城西域復通魏主如陰山之北發諸州兵三分之一各於其州戒嚴以須後命徙諸種雜民五千餘家於北邊令就北畜牧以餌柔然壬寅魏高涼王那軍至寧頭城吐谷渾王慕利延

擁其部落西度流沙吐谷渾慕瓚之子被囊逆擊擊破之被囊遁走中山公杜豐帥精騎追之度三危至雪山生擒被囊及吐谷渾什歸乞伏熾磐之子成龍皆送平城慕利延遂西入于闐殺其王據其地死者數萬人九月癸酉上餞衡陽王義季于武帳岡上將行敕諸子且勿食至會所設饌日旰不至有饑色上乃謂曰汝曹少長豐佚不見百姓艱難今使汝曹識有饑苦知以節儉御物耳裴子野論曰善乎太祖之訓也夫侈興於有餘儉生於不足欲其隱約莫若貧賤習其險艱利以任使達其情僞易以躬臨

太祖若能率此訓也難其志操卑其禮秩教成德立
然後授以政事則無怠無荒可播之於九服矣高祖
思固本枝崇樹襁褓後世遵守迭據方岳及乎泰始
之初升明之季絕咽於衾衽者動數十人國之存亡
既不是繫早肆民上非善誨也 魏民間訛言滅魏
者吳盧水胡蓋吳聚衆反於杏城諸種胡爭應之有
衆十餘萬遣其黨趙綰來上表自歸冬十月戊子長
安鎮副將拓跋紇帥衆討吳紇敗死吳衆愈盛民皆
渡渭奔南山魏主發高平救勒騎赴長安命將軍叔
孫拔領攝并秦雍三州兵屯渭北 十一月魏發冀

州民造浮橋於碣磔津

蓋吳遣別部帥白廣平而

掠新平安定諸胡皆聚衆應之又分兵東掠臨晉巴
東將軍章直擊破之溺死於河者三萬餘人吳又遣
兵西掠至長安將軍叔孫拔與戰於渭北大破之斬
首三萬餘級河東蜀薛永宗聚衆以應吳襲擊聞喜
聞喜縣無兵仗令憂惶無計縣人裴駿帥厲鄉豪擊
之永宗引去魏主命薛謹之子拔劄合宗鄉壁於河
際以斷二寇往來之路庚午魏主使殿中尚書拓跋
處直等將二萬騎討薛永宗殿中尚書乙拔將三萬
騎討蓋吳西平公寇提將萬騎討白廣平吳自號天

台王署置百官

辛未魏主還宮

魏選六州驍騎

二萬使永昌王仁高京王那分將之爲二道掠淮泗

以北徙青徐之民以實河北

癸未魏主西巡

初

魯國孔熙先博學文史兼通數術有縱橫才志爲員外散騎侍郎不爲時所知憤憤不得志父默之爲廣州刺史以賊獲罪大將軍彭城王義康爲救解得免及義康遷豫章熙先密懷報效且以爲天文圖讖帝必以非道晏駕出骨肉相殘江州應出天子以范曄志意不滿欲引與同謀而熙先素不爲曄所重太子中舍人謝綜曄之甥也熙先傾身事之綜引熙先與

曄相識熙先家饒於財數與曄博故爲拙行以物輸之曄旣利其財又愛其文藝由是情好款洽熙先乃從容說曄曰大將軍英斷聰敏人神攸屬失職南垂天下憤怨小人受先君遺命以死報大將軍之德頃人情騷動天文舛錯此所謂時運之至不可推移者也若順天人之心結英豪之士表裏相應發於肘腋然後誅除異我崇奉明聖號令天下誰敢不從小人請以七尺之軀三寸之舌立功立事而歸諸君子丈人以爲何如曄甚愕然熙先曰昔毛玠竭節於魏武張溫畢議於孫權彼二人者皆國之後又豈言行玷

缺然後至於禍辱哉皆以廉直勁正不得久容丈人之於本朝不深於二主人間雅譽過於兩臣讒夫側目爲日久矣比肩競逐庸可遂乎近者殷鉞一言而劉班碎首彼豈父兄之讐百世之怨乎所爭不過榮名勢利先後之間耳及其末也唯恐陷之不深發之不早戮及百口猶曰未厭是可爲寒心悼懼豈書籍遠事也哉今建大勳奉賢哲圖難於易以安易危享厚利收鴻名一旦苞舉而有之豈可棄置而不取哉曄猶疑未決熙先曰又有過於此者愚則未敢道耳曄曰何謂也熙先曰丈人奕葉清通而不得連姻帝

室人以犬豕相遇而丈人曾不耻之欲爲之死不惑乎曄門無內行故熙先以此激之曄默然不應反意乃決曄與沈演之竝爲帝所知曄先至必待演之俱入演之先至嘗獨被引曄以此爲怨曄累經義康府佐中間獲罪於義康謝綜及父述皆爲義康所厚綜弟約娶義康女綜爲義康記室參軍自豫章還申義康意於曄求解晚隙復敦往好大將軍府史仲承祖有寵於義康聞熙先有謀密相結納丹楊尹徐湛之素爲義康所愛承祖因此結事湛之告以密計道人灋略尼灋靜皆感義康舊恩竝與熙先往來灋靜

妹夫許曜領隊在臺許爲內應瀟靜之豫章熙先付以牋書陳說圖讖於是密相署置及素所不善者竝入死目熙先又使弟休先作檄文稱賊臣趙伯符肆兵犯蹕禍流儲宰湛之曄等投命奮戈即日斬伯符首及其黨與今遣護軍將軍臧質奉璽綬迎彭城王正位辰極熙先以爲舉大事宜須以義康之旨諭衆曄又詐作義康與湛之書令誅君側之惡宣示同黨帝之燕武帳岡也曄等謀以其日作亂許曜侍帝扣刀目曄曄不敢仰視俄而座散徐湛之恐事不濟密以其謀白帝帝使湛之具探取本末得其檄書選署

姓名上之帝乃命有司收掩窮治其夜呼曄置客省先於外收綜及熙先兄弟皆款服帝遣使詰問曄曄猶隱拒熙先聞之笑曰凡處分符檄書疏皆范所造云何於今方作如此抵蹋邪帝以曄墨迹示之乃具陳本末明日仗士送付廷尉熙先望風吐款辭氣不撓上奇其才遣人慰勉之曰以卿之才而滯於集書省理應有異志此乃我負卿也又責前吏部尚書何尚之曰使孔熙先年將三十作散騎郎那不作賊熙先於獄中上書謝恩且陳圖讖深戒車以骨肉之禍曰願且勿遺棄存之中書若囚死之後或可追錄庶

九泉之下少塞責曄在獄爲詩曰雖無嵇生琴庶
同夏侯色曄本意謂入獄即死而上窮治其獄遂經
二旬曄更有生望獄吏戲之曰外傳詹事或當長繫
曄聞之驚喜綜熙先笑之曰詹事曄昔攘袂瞋目躍
馬顧盼自以爲一世之雄今擾攘紛紜畏死乃爾設
令賜以性命人臣圖主何顏可以生存十二月乙未
曄綜熙先及其子弟黨與皆伏誅曄母至市涕泣責
曄以手擊曄頸曄色不怍妹及妓妾來別曄悲涕流
漣綜曰舅殊不及夏侯色曄收淚而止謝約不預逆
謀見兄綜與熙先遊常諫之曰此人輕事好奇不近
於道果銳無檢未可與狎綜不從而敗綜母以子弟
自蹈逆亂獨不出視曄語綜曰姊今不來勝人多矣
收籍曄家樂器服玩竝皆珍麗妓妾不勝珠翠母居
止單陋唯有一厨盛樵薪弟子冬無被叔父單布衣
裴子野論曰夫有逸群之才必思沖天之據蓋俗
之量則憤常均之下其能守之以道將之以禮殆爲
鮮乎劉弘仁范蔚宗皆忸志而貪權矜才以徇逆累
葉風素一朝而隕嚮之所謂智能翻爲亡身之具矣
徐湛之所陳多不盡爲曄等辭所連引上赦不問
臧質熹之子也先爲徐兗二州刺史與曄厚善曄敗

以爲義興太守有司奏削彭城王義康爵收付廷尉
治罪丁酉詔免義康及其男女皆爲庶人絕屬籍徙
付安成郡以寧朔將軍沈邵爲安成相領兵防守邵
璞之兄也義康在安成讀書見淮南厲王長事廢書
歎曰自古有此我乃不知得罪爲宜也庚戌以前豫
州刺史趙伯符爲護軍將軍伯符孝穆皇后之弟子
也 初江左二郊無樂宗廟雖有登歌亦無二舞是
歲南郊始設登歌 魏安南平南府移書兗州以南
國僑置諸州多濫北境名號又欲遊獵具區兗州答
移曰必若因土立州則彼立徐揚豈有其地復知欲
遊獵具區觀化南國開館飾邸則有司存呼韓入漢
厥儀未泯饋餼之秩每存豐厚

二十三年春正月庚申尚書左僕射孟顗罷 戊辰
魏主軍至東雍州臨薛永宗壘崔浩曰永宗未知陛
下自來衆心縱弛今北風迅疾宜急擊之魏主從之
庚午圍其壘永宗出戰大敗與家人皆赴汾水死其
族人安都先據弘農棄城來奔辛未魏主南如汾陰
濟河至洛水橋聞蓋吳在長安北帝以渭北地無穀
草欲渡渭南循渭而西以問崔浩對曰夫擊蛇者先
擊其首首破則尾不能掉今蓋吳營去此六十里輕

騎趨之一日可到則破之必矣破吳南向長安亦不過一日一日之乏未至有傷若從南道則吳徐入北山猝未可平帝不從自渭南向長安庚辰至戲水吳衆聞之悉散入北地山軍無所獲帝悔之二月丙戌帝至長安丙申如盤屋歷陳倉還如雍城所過誅民夷與蓋吳通謀者乙板等諸軍大破蓋吳於杏城吳復遣使上表求援詔以吳爲都督關隴諸軍事雍州刺史北地公使雍梁二州發兵屯境上爲吳聲援遣使賜吳印一百二十一紐使吳隨宜假授 初林邑王范陽邁雖遣使入貢而寇盜不絕所貢亦薄

帝遣交州刺史檀和之討之南陽宗慤家世儒素慤獨好武事常言願乘長風破萬里浪及和之伐林邑慤自奮請從軍詔以慤爲振武將軍稱之遣慤爲前鋒陽邁聞軍出遣使上表請還所掠日南民輸金一萬斤銀十萬斤帝詔和之若陽邁果有款誠亦許其歸順和之至朱梧戍遣府戶曹參軍婁仲基等詣陽邁陽邁執之和之乃進軍圍林邑縣范扶龍於區粟城陽邁遣其將范毗沙逵救之宗慤潛兵躡擊毗沙逵破之 魏主與崔浩皆信重寇謙之奉其道浩素不喜佛瀆每言於魏主以爲佛瀆虛誕爲世費害宜

悉除之及魏主討蓋吳至長安入佛寺沙門飲從官酒從官入其室見大有兵器出以白帝帝怒曰此非沙門所用必與蓋吳通謀欲爲亂耳命有司案誅闔寺沙門關其財產大得釀具及州郡牧守富人所寄藏物以萬計又爲窟室以匿婦女浩因說帝悉誅天下沙門毀諸經像帝從之寇謙之與浩固爭浩不從先盡誅長安沙門焚毀經像并敕留臺下四方令一用長安瀆詔曰昔後漢荒君信惑邪僞以亂天常自古九州之中未嘗有此夸誕大言不本人情叔季之世莫不眩焉由是政教不行禮義大壞九服之內

爲丘墟朕承天緒欲除僞定真復羲農之治其一切盪除滅其蹤迹自今已後敢有事胡神及造形像泥人銅人者門誅有非常之人然後能行非常之事非朕孰能去此歷代之僞物有司宣告征鎮諸軍刺史諸有浮圖形像及胡經皆擊破焚燒沙門無少長悉阬之太子晃素好佛瀆屢諫不聽乃緩宣詔書使遠近豫聞之得各爲計沙門多亡匿獲免或收藏經像唯塔廟在魏境者無復孑遺 魏主徙長安工巧二千家於平城還至洛水分軍誅李閏叛羌 太原顏白鹿私入魏境爲魏人所得將殺之詐云青州刺史

杜驥使其歸誠魏人送白鹿詣平城魏主喜曰我外家也使崔浩作書與驥且命永昌王仁高京王那將兵迎驥攻冀州刺史申恬於歷城杜驥遣其府司馬夏侯祖歡等將兵救歷城魏人遂寇充青冀三州至清東而還殺掠甚衆北邊騷動帝以魏寇爲憂咨訪群臣御史中丞何承天上表以爲凡備匈奴之策不過二科武夫盡征伐之謀儒生講和親之約今若欲追蹤衛霍自非大田淮泗內實青徐使民有贏儲野有積穀然後發精卒十萬一舉蕩夷則不足爲也若但欲遣軍追討報其侵暴則彼必輕騎奔走不肯會戰徒興巨費不損於彼報復之役將遂無已斯策之最末者也安邊固守於計爲長臣竊以曹孫之霸才均智敵江淮之間不居各數百里何者斥候之郊非耕牧之地故堅壁清野以候其來整甲繕兵以乘其弊保民全境不出此塗要而歸之其策有四一曰移遠就近今青兗舊民及冀州新附在界首者三萬餘家可悉徙置大峴之南以實內地二曰多築城池以居新徙之家假其經用春夏佃牧秋冬入保寇至之時一城千家堪戰之士不下二千其餘羸弱猶能登陴鼓譟足抗群虜三萬矣三曰纂輜車牛以載糧械

計千家之資不下五百耦牛爲車五百兩參合鈎連以衛其衆設使城不可固平行趨險賊所不能于有急徵發信宿可聚四日計丁課仗凡戰士二千隨其便能各自有仗素所服習銘刻由已還保輸之於庫出行請以自新弓箭鐵民不得者官以漸充之數年之內軍用粗備矣近郡之師遠屯清濟功費旣重嗟怨亦深以臣料之未若即用彼衆之易也今因民所利導而帥之兵彊而敵不戒國富而民不勞比於優復隊伍坐食糧廩者不可同年而校矣 魏金城 固天水梁會與秦益雜民萬餘戶據上邽東城反

攻逼西城秦益二州刺史封敕文拒却之氏羌萬餘人休官屠各二萬餘人皆起兵應固會敕文擊固斬之餘衆推會爲主與敕文相攻 夏四月甲申魏主至長安 丁未大赦 仇池人李洪聚衆自言應王梁會求救於氏王楊文德文德曰兩雄不竝立若須我者宜先殺洪會誘洪斬之送首於文德五月癸亥魏主遣安豐公問根帥騎赴上邽未至會棄東城走敕文先掘重塹於外嚴兵守之格鬪從夜至旦敕文曰賊知無生路致死於我多殺傷士卒未易克也乃以白虎幡宣告會衆降者赦之會衆遂潰分兵追討

悉平之略陽人王元達聚衆屯松多川敕文又討平之蓋吳收兵屯杏城自號秦地王聲勢復振魏主遣永昌王仁高涼王那督北道諸軍討之檀和之等拔區粟斬范扶龍乘勝入象浦林邑王陽邁傾國來戰以具裝被象前後無際宗慤曰吾聞外國有師子威服百獸乃製其形與象相拒象果驚走林邑兵大敗和之遂克林邑陽邁父子挺身走所獲未名之寶不可勝計宗慤一無所取還家之日衣櫛蕭然

六月癸未朔朔日有食之甲申魏發冀相定三州兵一萬人屯長安南山諸谷以備蓋吳竄逸丙戌又發

司幽定冀四州兵十萬人築畿上塞圍起上谷西至河廣縱千里帝築北堤立玄武湖築景陽山於華林

園秋七月辛未以散騎常侍杜坦爲青州刺史坦驥之兄也初杜預之子耽避晉亂居河西仕張氏前

秦克涼州子孫始還關中高祖滅後秦坦兄弟從高祖過江時江東王謝諸族方盛北人晚渡者朝廷悉以儉荒遇之雖復人才可施皆不得踐清塗上嘗與坦論金日磾曰恨今無復此輩人坦曰日磾假生今世養馬不暇豈辨見知上變色曰卿何量朝廷之薄也坦曰請以臣言之臣本中華高族晉氏喪亂播遷

涼土世業相承不殞其舊直以南度不早便以荒倉
賜隔日磔胡人身爲牧圉乃超登內侍齒列名賢聖
朝雖復拔才臣恐未必能也上嘿然 八月魏高涼
王那等破蓋吳獲其二叔諸將欲送詣平城長安鎮
將陸俟曰長安險固風俗豪伎平時猶不可忽况承
荒亂之餘乎今不斬吳則長安之變未已也吳一身
潛竄非其親信誰能獲之若停十萬之衆以追一人
又非長策不如私許吳叔免其妻子使自追吳擒之
必矣諸將咸曰今賊黨衆已散唯吳一身何所能至
俟曰諸君不見毒蛇乎不斷其首猶能爲害吳天性

凶狡今若得脫必自稱王者不死以惑愚民爲患心
大諸將曰公言是也但得賊不殺而更遣之若遂往
不返將何以任其罪俟曰此罪我爲諸君任之高涼
王那亦以俟計爲然遂赦二叔與刻期而遣之及期
吳叔不至諸將皆咎俟俟曰彼伺之未得其便耳必
不負也後數日吳叔果以吳首來傳詣平城永昌王
仁等討吳餘黨白廣平路那羅等悉平之以陸俟爲
內都大官會安定盧水胡劉超等聚衆萬餘人反魏
主以俟威恩著於關中復加俟都督秦雍二州諸軍
事鎮長安謂俟曰關中奉化日淺恩信未洽吏民數

爲逆亂今朕以重兵授卿則超等必同心協力據險拒守未易攻也若兵少則不能制賊卿當自以方畧取之俟乃單馬之鎮超等聞之大喜以俟爲無能爲也俟既至諭以成敗誘納超女與爲姻戚以招之超自恃其衆猶無降意俟乃帥其帳下親往見超超使人逆謂俟曰從者過三百人當以弓馬相待不及三百人當以酒食相供俟乃將二百騎詣超超設備甚嚴俟縱酒盡醉而還頃之俟復選敢死士五百人出獵因詣超營約曰發機當以醉爲限既飲俟陽醉上馬大呼手斬超首士卒應聲縱擊殺傷千數遂平之

魏主徵俟還爲外都大官是歲吐谷渾復還舊土

西

卷之三

